



Constituziun

dalla pleiv da Sevgein/Castrisch/Riein

I. Determinaziuns generalas

Art. 1

Concepziun

Sebasond sin ils art. 98 e 99 dalla constituziun cantunala dil Grischun e sin art. 19 ss dalla baselgia catolica dil cantun Grischun exista la pleiv catolica da Sevgein/Castrisch/Riein. La pleiv ei ina corporaziun dil dretg public.

Art. 2

Territori

La pleiv cumpeglia il territori dallas vischnauncas politicas da Sevgein, Castrisch e Riein.

Art. 3

Commembers

Commembers dalla pleiv ein tuttas personas da confessiun roman-catolica che habiteschan a Sevgein/Castrisch/Riein.

L'extrada ord la pleiv vegn renconuschida mo sin fundament d'ina declaronza a scret per mauns dalla suprastonza dalla pleiv.

Art. 4

Intent

La pleiv procura per ils mieds necessaris (persunal e finanzas) dalla pastoraziun conform al temps sin siu intsches. Ella promova il contact denter ils commembers e sustegn en collaboraziun cul plevon la veta religiosa. Ella representa ils interess da ses commembers envers las autoritads ecclesiasticas e publicas.

Art. 5

Dretg da votar e d'elecziun

Il dretg da votar e d'elecziun posseda scadin commember dalla pleiv suenter haver cumplenu il 18avel onn, senza risguard sin la naziunalitad.

Art. 6

Exclusiun

Ensemen astgan buca seser en suprastonza ni en ina cumissiun dalla pleiv geniturs cun lur affons, fargliuns, consorts, sir e sira cun lur schienders e brits.

Art. 7

Recusaziun

Il commember d'in organ dalla pleiv, d'ina cummisiun ei obligaus da prender stgisa tier votaziuns e tractaziuns, sch'ina fatschenta pertucca el sez, ni sch'in da ses parents (tochen el grad menziunau egl art. 6) ha in interess personal direct en caussa.

En cass da contestaziun decida igl organ pertuccau, en assenza digl interessau, schebein ils motivs da prender stgisa seigien obligonds.

Art. 8

Petiziun

Scadin commember dalla pleiv sa inoltrar a scret propositas, petiziuns e reclamaziuns che pertuccan damondas specialas ni generalas alla pleiv. Quellas ston vegnir fatgas a scret per mauns dalla suprastonza. La suprastonza ei obligada da prender posiziun a scret leutier ton pli spert.

Art. 9

Iniziativa

Iniziativas a scret per mauns dalla radunonza da pleiv ein d'inoltrar cun ina motivaziun alla suprastonza. Ellas ston esser suttascrettas da silmeins 10 votants.

La suprastonza ei obligada da suttametter ina tala iniziativa enteifer 6 meins alla radunonza da pleiv e quei ensemen cun sia posiziun ni cun ina cunterproposta.

Art. 10

Interpellaziun

A caschun dalla radunonza da pleiv sa mintga votant pretender sclariment dalla suprastonza sur da scadina fatschenta che pertucca la pleiv.

Ina tala damonda sto buca star en connex cun las tractandas publicadas dalla radunonza. La suprastonza sa dar risposta immediat a bucca, a scret ni a bucca a caschun dalla proxima radunonza da pleiv.

Art. 11

Moziun

A caschun dalla radunonza da pleiv ha mintga votant il dretg da far propositas partenent fatgs ch'ei buca publicai sin gliesta da tractandas.

Vegn ina tala proposta acceptada dalla radunonza sco moziun ha la suprastonza da suttametter rapport e proposta alla proxima radunonza da pleiv.

Art. 12

Recuors

Encunter conclus e decrets dalla radunonza da pleiv e dalla suprastonza sa, tenor art. 25 ss dalla costituziun dalla baselgia catolica dil Grischun, vegnir recurriu enteifer 20 dis tier la cumissiun administrativa dil Corpus Catholicum.

Art. 13

Egualitad

Las indicaziuns davart las persunas e las funcziuns en questa costituziun serefereschan ad omisduas schlatteinas, aschinavon ch'ei resulta buca enzatgei auter ord il senn dalla costituziun.

II. Determinaziuns organisatoricas

Art. 14

Organs

Ils organs dalla pleiv ein:

1. La radunonza da pleiv
2. La suprastonza da pleiv
3. Ils revisurs da quen
4. Il cussegl pastoral

1. La radunonza da pleiv

Art. 15

La radunonza da pleiv ei igl organ suprem dalla pleiv. Ella cumpeglia ils commembers cun dretg da vuschar.

Art. 16

Cumpetenzas

La radunonza da pleiv ha las suandontas cumpetenzas:

- a) eleger la suprastonza, ils revisurs ed il cussegl pastoral
- b) eleger il plevon enteifer las prescripziuns ecclesiasticas
- c) relaschar ni reveder la costituziun dalla pleiv, il reglament da taglia ni auters regulativs dalla pleiv
- d) approbar il quen annual ed il preventiv
- e) fixar il pei da taglia sin proposta dalla suprastonza
- f) approbar il protocol
- g) fixar ils salaris dalla suprastonza
- h) concluder davart expensas che survargan la cumpetenzza dalla suprastonza
- i) concluder sur damondas resalvadas expressivamein alla radunonza ni che vegnan suttamessas dalla suprastonza ad ella.

- j) decider pertuccont cumpras, vendas ed impegnaziuns da beins dalla pleiv.
- k) prender conclus davart process e recuors, sco era da far convenziuns e contracts d'impurtonza.

La radunonza da pleiv ha tuts dretgs e duers ch'ei buca surdai expressivamein alla suprastonza.

Art. 17

Convocaziun

La radunonza da pleiv vegn convocada dil president dalla pleiv tenor conclus dalla suprastonza.

La convocaziun cun gliesta da tractandas vegn publicada en mintga cass silmeins 2 jamnas avon la radunonza.

Radunonzas extraordinarias vegnan convocadas sin giavisch da silmeins 10 votants dalla pleiv ni sche la suprastonza anfla ei per necessari.

Art. 18

Conclus

La radunonza da pleiv convocada tenor las prescripziuns da questa costituziun ei cumpetenta da concluder.

Las tractandas ein da predeliberar entras la suprastonza.

Tractandas che vegnan presentadas pér a caschun dalla radunonza vegnan surdadas alla suprastonza. In'exceptiun ei lubida mo cun risguard da fatschentas urgentas, e quei entras ina maioritad da duas tierzas dils votants presents.

Art. 19

Votaziuns ed elecziuns

Elecziuns e votaziuns vegnan per ordinari fatgas cun plimaun. Pertuccont elecziuns sa in singul votant pretender scrutini, ferton ch'ei drova per ulteriuras fatschentas la maioritad dils votants.

Per tuttas votaziuns vala igl absolut pli (mesadad plus ina vusch) dallas vuschs valeivlas dadas giu. Ein las vuschs ulivas, decida il president cun la vusch da tagl. Tier elecziuns vala el secund scrutini il relativ pli. Tier equalitad dallas vuschs decida denton la sort.

Art. 20

Perioda d'uffeci surdada d'uffeci

Ils funcziunaris dalla pleiv vegnan elegi dalla radunonza da pleiv per ina perioda da mintgamai 2 onns. Alternont vegnan mintgamai president, actuar ed ugau pervenda elegi. Il proxim onn ein lu cassier, ugau baselgia, ils dus revisurs ed ils commembers dil cussegl pastoral d'eleger.

La scumiada d'uffeci succeda suenter las elecziuns, per regla igl 1. da matg. Reelegiun ei pusseivla senza limita.

In funcziunari partent ei obligaus da procurar per ina surdada regulara digl uffeci.

En cass d'ina demissiun ni vacanza duront la perioda d'uffeci decida la suprastanza da pleiv, schebein ei basegna ina elecziun remplazonta entras la radunonza da pleiv.

Ina demissiun d'in uffeci ei d'inoltrar a scret alla suprastanza da pleiv, e quei sil pli tard entochen ils 31 da december.

2. La suprastanza da pleiv

Art. 21

Concepziun

La suprastanza ei igl organ executiv ed administrativ dalla pleiv sco era organ dalla baselgia catolica dil cantun Grischun.

Ella consista ord:

- il president
- il cassier
- igl actuar
- igl ugau parvenda
- igl ugau baselgia

Il responsabel per la pastoraziun ni siu substitut ei ex officio commember dalla suprastanza.

Art. 22

Cumpetenzas

La suprastanza dalla pleiv ha las suandontas cumpetenzas:

- a) representar la pleiv enviers las autoritads ecclesiasticas e politicas sco era enviers tiarzas personas
- b) cooperar tier l'execuziun da leschas, uordens e conclus
- c) menar il quen annual ed administrar la facultad dalla pleiv
- d) preparar las fatschentas per mauns dalla radunonza ed exequir ils conclus
- e) concluder davart expensas unicas entochen igl importo da frs. 3'000.00 ed expensas che serepetan entochen frs. 1'000.00 ad onn
- f) pladir caluster, catechet, organist ed auters gidonters tenor basegns cun fixar lur salarisaziun
- g) fixar la paga dil plevon cun risguardar las directivas dil Corpus Catholicum e firmar il contract
- h) survegilar las extradadas da commembers cun comunicar agl uffeci da taglia
- i) prender conclus davart process e recuors, sco era da far convenziuns e contracts aschilunsch che la summa incl. spesas e cuosts survarga buca frs. 3'000.00
- j) fixar il tscheins dallas immobilias dalla pleiv
- k) liquidar tuttas fatschentas che stattan buc en cumpetenzas dalla radunonza ni d'ina outra instituziun

Art. 23

Convocaziun

La suprastonza vegn convocada entras il president dalla pleiv tenor basegns ni sin giavisch da silmeins 2 suprastonts.

Art. 24

Cumpetenzza e
moda da conclus

La suprastonza ei cumpetenta da concluder, sche silmeins 3 commembers ein presents. Conclus vegnan pri cun il relativ pli dallas vuschs valeivlas. En cass da paritad decida tier votaziuns il president cun la vusch da tagl, tier elecziuns la sort.

Mintga suprastont ei obligaus da vuschar, resalvau las prescripziuns sur dil stadi da recusaziun tenor art. 6 e 7.

Conclus sin via circulara ein valeivels mo en cass d'unanimitad.

Art. 25

President

Il president convochescha las radunonzas da pleiv e las sedutas da suprastonza ed empeila quellas. Per cass ch'el ei impediud, vegn el substituiud entras il vicepresident. L'administraziun digl archiv dalla pleiv vegn surschada al president.

Art. 26

Cassier

Il cassier ei responsabels per l'administraziun dils beins e dalla facultad dalla pleiv e dallas fundaziuns.

El rimna las unfrendas e paga ils quens currents, meina la contabilitad e presenta il quen annual mintgamai alla radunonza generala da pleiv, administrescha il fondo da „messas fundadas“ sut la survegionza dallas autoritads ecclesiasticas, paga ils quens ed incassescha ils dabiens.

Igl incasso dalla taglia vegn surdaus alla canzlia communal.

Art. 27

Actuar,
protocols

Igl actuar ha da menar ils protocols dallas radunonzas da pleiv e dallas sedutas da suprastonza. El ei adina era il vice-president.

Ils protocols ein da formular aschia ch'els dattan sclariment silmeins davart ils conclus ed ils resultats da votaziuns ed elecziuns.

Ils protocols ein da suttascriver digl actuar e suenter la prelecziun ed approbaziun entras il president.

Art. 28

Ugau parvenda

Igl ugau parvenda ha quitau per baghetgs e furs dalla pleiv, ch'els baghetgs vegnien manteni e ch'els furs vegnien cultivai endretg.

Art. 29

Ugau baselgia

Igl ugau baselgia ha l'obligaziun da haver quitau per bien manteniment dalla baselgia parochiala e dalla caplutta da sontga Fossa. El procura per igl uorden dallas processziuns.

Art. 30

Delegaziun

La suprastanza sa delegar pensums al president, a singuls commembers ni ad ina cummissiun per liquidaziun. Sur dil resultat han ils incumbensai da rapportar alla suprastanza.

3. Ils revisurs da quen

Art. 31

Revisurs da
quen

Ils revisurs da quen examineschan mintg' onn il menaschi finanziel e tut ils quens dalla pleiv.
Els rendan rapport en scret e fan eventualas propostas alla radunanza generala.

4. Il Cussegl pastoral

Art. 32

Cussegl
pastoral

Il Cussegl pastoral dalla pleiv ei in organ ecclesiastic. Sia funcziun, sias cumpetenzas e sia cumposiziun vegnan normadas en in agen reglement. El seconstituescha sesez.

III. Determinaziuns economicas

Art. 33

Quens

Ils quens ein da serrar giu cun la fin digl onn.

Art. 34

Taglia da cultus

Per ademplir siu pensum incassescha la pleiv ina taglia da cultus.
La lescha da taglia circumscriva ils detagls.

Art. 35

Diever dalla
taglia

La taglia vegn applicada per:
a) expensas dalla pastoraziun e dil cultus
b) erecziun e manteniment d'objects che surveschan alla pleiv
c) curclar eventuals deficits
d) auters basegns dalla pleiv

Art. 36

Approbaziun
episcopala

Per vender, brattar ni impegnar beins da fondos ecclesiastics inclusiv objects da cult e d'art, per cumprar e prender si emprests, sco era per construir baghetgs drova ei l'approbaziun digl Ordinariat episcopal.

IV. Determinaziuns finalas

Art. 37

Revisiun

Questa constituziun sa da tut temps vegnir revedida parzialmein ni totalmein. Leutier ei l'approbaziun dalla cummissiun administrativa dil Corpus Catholicum necessaria.

Art. 38

Vigur

La presenta constituziun va en vigur suenter esser acceptada dalla radunonza da pleiv ed approvada entras la cummissiun administrativa dil Corpus catholicum.

Cheutras vegnan tuts uordens e reglements existents che cunterfan a questa constituziun mess ord vigur.

Questa constituziun ei vegnida approvada dalla radunonza dalla pleiv da Sevgein/Castrisch/Riein ils 4 da matg 2010.

Per la pleiv da Sevgein/Castrisch/Riein:

il president:

l'actuara:

Giachen Caduff

Alice Bertogg-Darms

Approbau dalla cummissiun administrativa dil Corpus Catholicum:

Cuera, la presidenta:

igl actuar: